




კავკასიის ეკონომიკის ყოველთვიური მიმოხილვა

ნოემბერი 2023





ეკონომიკური ზრდა



2023 წლის პირველი ცხრა თვის მდგომარეობით კავკასიის ეკონომიკის ზრდა 4.1%-ია. გასულ წელს კავკასიის ზრდა 7.8%-ს აღწევდა. ეკონომიკური ზრდის ტემპის კლება რუსეთიდან ადამიანური და ფინანსური კაპიტალის ნაკადების შემცირებასა და წინა წელთან შედარებით ნავთობის დაბალ ფასებს უკავშირდება.


✚ მიმდინარე წლის პირველ ცხრა თვეში საქართველოს ეკონომიკა 6.6%-ით გაიზარდა, ხოლო წინა თვეს ზრდის ტემპი 6.3%-ს შეადგენდა. ზრდაში მნიშვნელოვანი წვლილი საფინანსო, სამშენებლო, სავაჭრო და სტუმარ-მასპინძლობის სექტორებმა შეიტანა. კლების ტენდენცია დაფიქსირდა დამამუშავებელი მრეწველობის, ტრანსპორტისა და დასაწყობების, ასევე უძრავი ქონების სექტორებში.

🇧🇪 კავკასიის რეგიონში ზრდის ყველაზე მაღალი ტემპით სომხეთი გამოირჩევა. მიმდინარე წლის პირველ ცხრა თვეში სომხეთის ეკონომიკა 9.7%-ით გაიზარდა. უშუალოდ სექტემბერში, წინა წლის იმავე თვესთან შედარებით, ეკონომიკა 5.6%-ით გაფართოვდა. სომხეთის ეკონომიკურ ზრდაში განსაკუთრებული წვლილი სავაჭრო სექტორს აქვს, რომელიც ამ პერიოდში 23.3%-ით მოიმატა, ხოლო სამშენებლო დარგი კი - 17% -ით.

🇸🇪 რეგიონში ზრდის ყველაზე დაბალი ტემპი აზერბაიჯანში დაფიქსირდა. 2023 წლის პირველ ცხრა თვეში აზერბაიჯანის ეკონომიკა 0.8%-ით გაიზარდა. აზერბაიჯანის ეკონომიკის 38.2% ნავთობისა და გაზის ინდუსტრიას უკავია. ენერგორესურსების ფასი გასული წლის ანალოგიურ პერიოდთან შედარებით შემცირებულია. ნავთობისა და გაზის ინდუსტრიის გარეშე ზრდის მაჩვენებელი 3% იყო.



ინფლაცია და მონეტარული პოლიტიკა



ინფლაციის მაჩვენებელი კავკასიის რეგიონში ეკონომიკური ზრდის ტენდენციებს იმეორებს. საუკეთესო მდგომარეობა სომხეთშია, ხოლო ყველაზე ცუდი მაჩვენებელი აზერბაიჯანში ფიქსირდება.

✚ საქართველოში მიმდინარე წელს ინფლაციის ტემპი, წინა წელთან შედარებით, შემცირებულია. ოქტომბერში სამომხმარებლო ფასების წლიურმა ზრდამ 0.8% შეადგინა. ოქტომბრის ინფლაციაში მაღალი წვლილი სატრანსპორტო მომსახურების ფასებმა შეიტანა, რომელიც 3.6%-ით გაიზარდა. თუმცა, რიგ სექტორებში ფასების კლება დაფიქსირდა, მათ შორის, განათლების ფასები ყველაზე მეტით, 1.9%-ით შემცირდა. ამ ფონზე ცენტრალურმა ბანკმა ბოლო გადაწყვეტილებით რეფინანსირების განაკვეთი უცვლელად 10%-ზე შენარჩუნდა.

🇦🇿 რეგიონში ყველაზე დაბალი ინფლაციით სომხეთი გამოირჩევა. მიმდინარე წლის ოქტომბერში სამომხმარებლო ფასების წლიური ზრდა 0.1% იყო. ყველაზე მაღალი, 8.5%-იანი ზრდა ალკოჰოლისა და თამბაქოს ჯგუფში დაფიქსირდა, ხოლო 3%-იანი კლება სურსათის ფასებზე. ეს კი სამომხმარებლო ფასების ძირითადი ნაწილია. სომხეთის ცენტრალურმა ბანკმა მონეტარული პოლიტიკის შემსუბუქება მიმდინარე წელს დაიწყო. ბოლო გადაწყვეტილებით რეფინანსირების განაკვეთი 9.5%-მდე შემცირდა.

🇦🇲 აზერბაიჯანში ინფლაციის ტემპი კლების მიუხედავად, კვლავ მაღალ ნიშნულზე რჩება. მიმდინარე წლის ოქტომბერში სამომხმარებლო ფასების წლიურმა ზრდამ 3.9% შეადგინა, 5.1%-თან შედარებით სექტემბერში. აზერბაიჯანი რეგიონში შედარებით მაღალი ინფლაციით წინა პერიოდებშიც გამოირჩეოდა. მიუხედავად ამისა, აზერბაიჯანის ცენტრალური ბანკი პოლიტიკის გამკაცრებისგან თავს იკავებს. მეტიც, ნოემბრის დასაწყისში მონეტარული პოლიტიკის განაკვეთი 8.5%-მდე შემცირდა.